



Polítika Investigasaun Kilat Iha Timor-Leste

Mahein Nia Lian Nú. 78, 21 Maiu 2014



Relatoriu Fundasaun Mahein Nia Lian ne'e suporta husi povu Amerikanu liu husi Ajénsia Estadus Unidus ba Dezenvolvimentu Internasional (USAID) no Embaxada Finlandia iha Jakarta.

Vizaun husi autor sira ne'ebé expresa iha públikasaun relatoriu sira ne'e la representa vizaun husi Ajénsia Estadus Unidus ba Dezenvolvimentu Internasional (USAID) no Embaxada Finlandia.



Website: www.fundasaunmahein.org

Kontiudu Sira

Kontiudu sira	2
Introdusaun	3
Metodolojia	3
Relatoriu Komisaun Investigasaun Armas F-FDTL no PNTL 2011	4
Relatoriu Investigasaun KE ba Prosesu Akizisaun Kilat husi PT. PINDAD (Persero)	6
Implementasaun Relatoriu Investigasaun Nian To'o iha Ne'ebé Ona?	7
Kilat Aumenta iha Problematiku nia Laran	8
Sumariu Rekomendasaun	9
Bibliografia	10

Introdusaun

Problema kilat iha Timor-Leste seidauk to'o nia finalidade lolos no kontinua sai preokupasaun entidade tomak iha Timor-Leste. Portantu kilat hirak ne'ebé lakon iha krize 2006 no kilat sira ne'ebé lakon iha periodu sira tuir mai to'o agora seidauk hatene lolos ninia paradeiru. Maske iha ona investigasaun ba kilat ne'ebé lakon maibe públiku seidauk hatene prosesu sira ne'e to'o iha ne'ebé ona no oinsa implementasaun rekomendasaun husi investigasaun hirak ne'e nian.

Hanesan introdus tiha ona katak prosesu sira ne'e seidauk rezolve ho lolos mosu tan tentativa ida iha prosesu akizisaun kilat iha tinan 2012 husi empreza Indonezia PT. PINDAD (Persero) ba Polisia Nasional Timor-Leste (PNTL). Iha ne'ebé Fundasaun Mahein (FM) alerta dahuluk tiha ona katak prosesu sira hatama kilat deskonfia iha iregularidade no Parlamentu Nasional Komisaun B konsidera kilat ne'ebé hatama ilegal tanba la tuir prosedur legal nian.¹

Tanba ne'e, relatoriu ida ne'e sei relata kona-bá relatoriu investigasaun kilat nian ne'ebé hala'o husi Komisaun Investigasaun Armas FALINTIL-Força Defesa Timor-Leste (F-FDTL) no PNTL nian ne'ebé lakon iha krize 2006. Iha ne'ebé relatoriu ne'e hasai ona iha tinan rohan 2011 ho rekomendasaun sira no hato'o tiha ona ba Ministériu Defeza no Siguransa.

Nune'e mos relatoriu investigasaun ba prosesu akizisaun kilat PNTL ho empreza Indonezia PT. PINDAD (Persero) husi Komisaun Eventual tuir mandatu husi Rezolusaun Governu Nú. 13/2013 de 26 de Junho. Mandatu husi Komisaun Eventual hasai ona relatoriu iha 03 Feveireiru 2014 ho rekomendasaun sira no Komisaun hato'o ona ba Ministériu Defeza no Siguransa inklui Prezidencia da República.

Objetivu husi relatoriu ne'e atu hare kona-bá implementasaun rekomendasaun relatoriu investigasaun kilat PNTL nian lakon iha krize 2006 to'o iha ne'ebé ona no rekomendasaun relatoriu investigasaun prosesu akizisaun kilat husi empreza Indonezia PT. PINDAD ba PNTL. Portantu relatoriu rua ne'e komisaun entrega ona ba Governu maibe to'o agora iha nonok nia laran.

Metodolojia

Metodolojia ne'ebé adopta iha relatoriu ne'e mai husi diskusaun sira iha ekipa peskizador FM nian ho metodu *Security Sector Discussion* – SSD. Relatoriu ne'e nu'udar rezultadu monitorizasaun durante tinan 2011 – 2013 partikularmente iha prosesu investigasaun ne'ebé sai nonok nia laran. Rekolla informasaun no análise deskriptivu ba relatoriu dahuluk sira FM nia kona-bá problematiku kilat iha Timor-Leste, Relatoriu Investigasaun Konjunta, Relatoriu Komisaun Eventual inklui relatoriu husi media nasional sira.

¹ Fundasaun Mahein. (2013. Abril. 23).Paradeiru Kilat Ne'ebé Lakon La Klaru no Polemika Kilat Iha Timor-Leste.Mahein nia Lian Nú. 49.http://www.fundasaunmahein.org/wp-content/uploads/2013/04/MNL_nu.-49_23042013_Polemika-Kilat-pdf3.pdf

Ikus liu husi relatoriu ne'e, pontu rekomendasaun sira ba Governu atu konsidera kilat nu'udar problema ne'ebé seriu iha Timor-Leste atu fo solusaun ba kilat sira ne'ebé lakon iha krize 2006 ne'ebé kontinua lakon iha instituisaun siguransa no kilat foun ne'ebé aumenta la ho prosesu normal hanesan kilat PM2 – V1 husi empreza Indonezia PT. PINDAD (Persero).

Relatoriu Komisaun Investigasaun Armas F-FDTL no PNTL 2011

Ministeiru Defeza no Siguransa hari'i tiha ona Komisaun Investigasaun Armas F-FDTL ho PNTL iha tinan 2011 ho nia kompozisaun komisariu na'in lima mai husi F-FDTL nai'in rua, PNTL na'in rua no Serbisu Nasional Intelijensia na'in ida iha ne'ebé mandatu ba Komisaun Investigasaun bazeia ba:

- a. *Relatório resultadu Inspeksaun no Audit konjunta ba Armas F-FDTL ho PNTL iha tinan 2010.*
- b. *Despaxu S.E. Ministro Defesa no Seguransa, No.: 07/GABMDS/VII/2011, data 27 de Jullu de 2011, konaba "Kriasaun Grupu de Traballu no Nomeasaun Komisariu ne'ebé integra iha Grupu de Traballu refere".*
- c. *Diskusaun konjunta Komisarius nomeados ho S.E. Director-Geral SNI kona-ba preparasaun teknikus administrativus relasiona ho implementasaun prosesu investigasaun.²*

Iha mandatu ida ne'e Ministru Defeza no Siguransa nomeia ofisialmente Komisariu na'in lima atu asumi responsabilidade ba serbisu investigasaun kona-bá Armas PNTL ho F-FDTL nian ne'ebé maka seidauk rejistu. Hodi kumpri no responsabiliza Ordem S.Excia Ministru da Defeza no Siguransa iha leten maka komisariu na'in lima ho apoiu pesoal na'in 9 (sia) hahu nia kna'ar hodi investiga membru sira PNTL, F-FDTL, Internasionais, Deputados, veteranus no ema sivil balun ne'ebé iha ligasaun ho armas ne'ebé seidauk rejistu.³

Iha ne'ebé identifika membru PNTL na'in 26 (rua nulu resin neen) ba pistola no kilat HK-33 PNTL nian, membru PNTL ida refere pistola F-FDTL nian, ex-membru PNTL na'in 3 (tolu) ba pistola PNTL nian, ex-membru F-FDTL na'in 5 (lima) refere ba pistola F-FDTL nian no ema sivil na'in 1 (ida) refere ba kilat HK-33 PNTL nian. Relatoriu ne'e rekomenda mos katak ba ofisiais, sarjentu sira no ajente PNTL ne'ebé mensiona iha rekomedasaun relatoriu investigasaun proibidu ka bandu atu kaer kilat iha tempu serbisu.⁴ Membru PNTL ne'ebé rekomenda proibidu ka bandu atu kaer kilat iha tempu serbisu hamutuk 26 (rua nulu resin neeninvolve ofisial superior PNTL nian inklui inspetor, sarjentu no ajente balu.⁵Tuir relatoriu ne'ebé Komisaun

² Relatoriu Final Servisu Komisaun Investigasaun Armas F-FDTL ho PNTL, Husi Minstériu Defeza no Siguransa iha tinan 2011.

³ Relatoriu Final Servisu Komisaun Investigasaun Armas F-FDTL ho PNTL, Husi Minstériu Defeza no Siguransa iha tinan 2011.

⁴ Relatoriu Final Servisu Komisaun Investigasaun Armas F-FDTL ho PNTL, Husi Minstériu Defeza no Siguransa iha tinan 2011.

⁵ Relatoriu ida ne'e la fo detallu naran membru sira ne'ebé involve halakon kilat hirak ne'e tan segredu justisia. Maibe fokus ba implementasaun relatoriu ne'e to'o iha ne'ebé ona iha ne'ebé Komisaun Investigasaun entrega on aba Minstériu Defeza no Siguransa no orgaun relevante seluk.

Investigasaun rekomenda katak tenki loke prosesu investigasaun ba membru PNTL, ex-membru PNTL, ex-membru F-FDTL no ema sivil balu refere ba pistola no kilat hirak ne'ebé sira halo lakon iha tabela kraik ne'e.

Kilat ne'ebé lakon iha krize 2006 tuir relatoriu Komisaun Investigasaun iha tinan 2011

Nú.	Armas	Númeru Serial	Instituisaun
1.	Pistola	EEH-690	PNTL
2.	Pistola	ENU-249	PNTL
3.	Pistola	FHX-370	PNTL
4.	Pistola	EFP-140	PNTL
5.	Pistola	EFP-141	PNTL
6.	Pistola	FHX-267	PNTL
7.	Pistola	EFP-153	PNTL
8.	Pistola	EFP-926	PNTL
9.	Pistola	EFP-738	PNTL
10.	Pistola	FHX-364	PNTL
11.	Pistola	FHX-332	PNTL
12.	Pistola	EFP-203	PNTL
13.	Pistola	FHX-262	PNTL
14.	Pistola	EFP-088	PNTL
15.	Pistola	FGT-559	PNTL
16.	Pistola	EEH-781	PNTL
17.	Kilat HK-33	ATM.010027	PNTL
18.	Kilat HK-33	ATM.000790	PNTL
19.	Kilat HK-33	ATM.014779	PNTL
20.	Kilat HK-33	ATM.020163	PNTL
21.	Pistola	280 3763	F-FDTL
22.	Pistola	280 3900	F-FDTL
23.	Revolver	142456	F-FDTL
24.	Pistola	38 Especial CTC	F-FDTL
25.	Pistola Glock 19	EFP-806	F-FDTL

Fontes: Relatoriu Final Investigasaun Armasa F-FDTL ho PNTL tinan 2011

Tabela iha leten relata kilat hirak ne'ebé lakon tuir relatoriu investigasaun Komisaun nian iha tinan 2011. Maske kilat balu rekolla ona no balu seidauk hatene nia paradeiru iha ne'ebé. Maibela signifika taka dalan prosedimentu legal nian ba membru PNTL, ex-membru PNTL no ex-membru F-FDTL no ema sivil balu. Portantu prosesu sira ne'e tenki aplika ba se deit ne'ebé komete tuir rekomendasaun relatoriu investigasaun nian.

Iha ne'ebé Komisaun Investigasaun Armas F-FDTL ho PNTL rekomenda katak presiza loke investigasaun ba membru PNTL, ex-membru PNTL no ema sivil balu. Nune'e mos

rekomendasaun relatoriu husi Komisaun Investigasaun Armas F-FDTL ho PNTL liu-liu kilat PNTL nian rekomenda katak:

*“Loke prosesu kriminal no Disiplinar ba membros PNTL efektivus nomos ex-membro PNTL sira nebe laiha responsabilidade ba armas nebe pertence duni ba sira, no armas hirak ne’e iha prosesu investigasaun nia laran sira hatudu sira nia irresponsabilidade”.*⁶

Relatoriu Investigasaun Komisaun Eventual ba Prosesu Akizisaun Kilat husi PT. PINDAD (Persero)

Relatoriu Komisaun Eventual kona-bá prosesu akizisaun kilat PNTL iha PT. PINDAD (Persero) ho marka PM2 – V1 hasai ona iha loron 03 Feveireiru 2014 tuir mandatu husi Rezolusaun Governu Nú. 13/2013 de 26 de Juñu. Kompozisaun membru Komisaun Eventual nian mai husi Parlamentu Nasional Komisaun B, Casa Militar Prezidencia Repúblika, F-FDTL, Serbisu Nasional Intelijensia no Sekretaria Estadu Siguransa.

Relatoriu Komisaun relata katak hafoin halo tiha estudu ba dokumentu komprovativu sira no informasaun husi instituisaun relavante sira, Komisaun Eventual to’o iha konkluziun ikus ida katak akontese duni iregularidade balun iha prosesu akizisaun nia laran.⁷

Komisaun Eventual nian relatoriu identifika hahalok iregularidade sira ne’e mosu ho forma oin-oin, hahu kedas husi prosesu inisiu to’o entrada kilat. Liña koordinasaun ne’ebé ladiak iha instituisaun no entre instituisaun, indikasaun kona-bá abuzu poder no falsifikasaun dokumentu, nu’udar parte balun husi Komisaun Eventual hetan iha relatoriu ne’ebé hasai ona. Nune’e mos desizaun sosa kilat husi PT. PINDAD (Persero), foti liu husi estudu ne’ebé mukit, tanba la avalia didiak kompañia ninia viabilidade no haluha tiha aspetu polítika, defeza no siguransa, ne’ebé vital tebe-tebes ba ezistencia soberania país ida ne’e.⁸

Kilat PM2 – V1 Produitu PT. PINDAD (Persero)



Fontes: PT. PINDADA (Persero)

⁶ Relatoriu Final Servisu Komisaun Investigasaun Armas F-FDTL ho PNTL, Husi Minstériu Defeza no Siguransa iha tinan 2011.

⁷ Relatoriu Komisaun Eventual Kona-bá Prosesu Akizisaun Kilat PNTL iha PT. PINDAD (Persero).Relatoriu ne’e hasai iha loron 03 Feveireiru 2014.

⁸ Relatoriu Komisaun Eventual Kona-bá Prosesu Akizisaun Kilat PNTL iha PT. PINDAD (Persero).Relatoriu ne’e hasai iha loron 03 Feveireiru 2014.

Ho iregularidade sira ne'e, Komisaun Eventual relata rekomendasaun lubuk ida ne'ebé Governu tenki foti medida. Iha ne'ebé rekomendasaun husi relatoriu Komisaun nian rekomenda atu hadi'a planu akizisaun kilat iha tempu tuir mai ho prosesu sira ne'ebé orientadu ho prinsipiu governasaun diak. Rekomendasaun prinsipal seluk maka Komisaun Eventual rekomenda ba Governu atu buka tuir hahalok sira ne'e hotu liu husi prosidimentu legal sira ne'ebé maka iha, tantu disiplinar no kriminal.⁹Komisaun Eventual mos hato'o liu husi media nasional katak presiza investigasaun profunda ba Komandante Jeral PNTL no Sekretaria Estadu Siguransa hodi identifika aktu krime balun ne'ebé involve.¹⁰

Implementasaun Relatoriu Investigasaun Nian To'o iha Ne'ebé Ona?

Refere ba kilat ne'ebé lakon iha krize 2006 rekomendasaun prinsipal rua maka loke investigasaun ba membru PNTL, ex-membtu PNTL, ex-membru F-FDTL no ema sivil balu. Rekomendasaun prinsipal seluk maka probidiu ka bandu membru PNTL atu kaer kilat iha tempu serbisu tuir rekomendasaun relatoriu Komisaun nian. Iha ne'ebé distina ba Ministériu Defeza no Siguransa maka kondus prosesu ne'e.

FM nia hare relatoriu ne'e la iha implementasaun husi Ministériu Defeza no Siguransa maske relatoriu ne'e rasik rekomenda atu kontinua prosesu sira ne'ebé prinsipal tebes iha prosidimentu legal nian no oinsa buka tuir kilat hirak ne'ebé sei lakon. Ida ne'e hamosu duvidas iha públiku tanbasa la implementa?

FM nia leitura ba rekomendasaun relatoriu investigasaun refere ba membru PNTL ne'ebé tenki loke investigasaun no pribiodu ka bandu lori kilat iha serbisu laran la iha prosesu ruma hasoru sira no livre husi prosesu sira ne'ebé rekomenda tiha ona. Membru PNTL balu ne'ebé tama iha lista rekomendasaun investigasaun nian balu hetan promosaun no promove ba kargu superior no diviza ofisial superior, inspetor, sarjentu no ajente sira. Signifika instituisaun PNTL promove impunidade ba membru sira ne'ebé rekomenda tiha ona tenki loke prosesu disiplinar no kriminal.

Nune'e mos ba membru PNTL ex-membru PNTL, ex-membru F-FDTL no ema sivil balu depois de relatoriu investigasaun sai la iha investigasaun kontinua hodi hakle'an informasaun no faktu sira ne'ebé deskobre iha relatoriu investigasaun Komisaun nian hodi hatene paradeiru kilat sira ne'ebé sei lakon. Portantu kilat hirak ne'ebé lakon to'o agora kontinua lakon. Deputadu César Valente "Piloto" husu atu buka tuir no investiga kilat nia paradeiru ne'ebé deskonfia iha ex-militár balun maka sei rai.¹¹Tanba kilat hirak ne'ebé lakon krize 2006 iha dadus kompletu.¹²

⁹ Relatoriu Komisaun Eventual Kona-bá Prosesu Akizisaun Kilat PNTL iha PT. PINDAD (Persero). Relatoriu ne'e hasai iha lora 03 FEVEREIRU 2014.

¹⁰ Ximenes Florencio. (2014. Marsu. 17). KE Husu MP Investiga Long ho SES. Jornal Independenti.

¹¹ Ximenes Florencio. (2013. Marsu. 24). Komisaun B PN Ezije PNTL-F-FDTL Buka Kilat Lakon iha Krize 2006. Jornal Independente.

¹² Ximenes Florencio. (2013. Marsu. 24). Komisaun B PN Ezije PNTL-F-FDTL Buka Kilat Lakon iha Krize 2006. Jornal Independent.

Relatoriu investigasaun seluk maka relatoriu investigasaun ba prosesu akizisaun kilat PM2 – V1 husi empreza Indonezia PT. PINDAD (Persero) ba PNTL ne'ebé hasai ona iha loron 03 Feveiru 2014. Relatoriu ne'e identifika katak iha iregularidade iha prosesu sira akizisaun to'o kilat tama, iha ne'ebé Parlamentu Nasional Komisaun B rasik konsidera kilat ne'e ilegal.¹³

Rekomendasaun relatoriu Komisaun Eventual nian rekomenda mos tenki loka prosesu disiplinar no kriminal ba autor prinsipal sira iha instituisaun PNTL no Sekretaira Estadu Siguransa tan involve prosesu akizisaun no hatama kilat iha ne'ebé la tuir prosedimentu legal no refere ba Komandante Jeral PNTL no Sekretariu Estadu Siguransa.¹⁴ FM husu katak implementasaun relatoriu investigasaun to'o iha ne'ebé ona, ne'ebé responsabiliza polítika husi Ministériu Defeza no Siguransa.

FMhusu Ministériu Defeza no Siguransa tenki iha seriedade atu kondus implementasaun relatoriu investigasaun ne'e rasik tantu iha polítika no kriminal nian inklui pratika seluk ne'ebé la promove governasaun diak.

Kilat Aumenta iha Problematiku nia Laran

Públiku kontinua preokupa kona-bá kilat ne'ebé lakon iha krize 2006 ninia paradeiru la klaru. Deputadu Cesar Valente “Pilotu” hato'o ba media nasional sira katak kilat ne'ebé lakon husi PNTL HK-33 hamutuk 2 (rua) , Pistola 10 (sanulu) no F-FDTL nia kilat boot 1 (ida) maka sei lakon.¹⁵ Maibe número kilat ne'ebé lakon seidak klaru, ofisial Governu no polisiai sira hato'o número ne'ebé diferente no sai polemika liu tan iha públiku no halo ema hotu tauk tebes. Diretúr Departamentu Justisa PNTL, Superintendenti Xefi Carlos Jeronimo rekuñese rekollamentu kilat ne'ebé lakon iha tempu krize 2006 seidak iha rezultadu, PNTL kontinua buka tuir.¹⁶

Deputadu César Valente “Piloto” lamenta ho instituisaun PNTL no husu atu buka tuir no investiga kilat nia paradeiru ne'ebé deskonfia iha ex-militár balun maka sei rai.¹⁷ Tanba kilat hirak ne'ebé lakon krize 2006 iha dadus kompletu.¹⁸ Ironiku liu tan, kilat dalabalu sirkula iha media sosial sira (facebook) hanesan brinkerus ida ne'ebé kaer husi ofisial Governu balu no feto klosan sira famlia husi ofisial polisia no miltar balu inklui labarik kiik sira.¹⁹

¹³ Fundasaun Mahein. (2013. Abril. 23).Paradeiru Kilat Ne'ebé Lakon La Klaru no Polemika Kilat Iha Timor-Leste.Mahein nia Lian Nú. 49.http://www.fundasaunmahein.org/wp-content/uploads/2013/04/MNL_nu.-49_23042013_Polemika-Kilat-pdf3.pdf

¹⁴ Ximenes Florencio. (2014. Marsu. 17).KE Husu MP Investiga Long ho SES. Jornal Independenti.

¹⁵ Ximenes Florencio. (2013. Marsu. 24). Komisaun B PN Ezije PNTL - F-FDTL Buka Kilat Lakon iha Krize 2006. Jornal Independent.

¹⁶ Flo. (2014. Feveiru. 2014).Kilat Lolon 23 Sei Lakon.<http://www.diariutimorpost.tl/berita-925-kilat-lolon-23-sei-lakon.html>

¹⁷ Ximenes Florencio. (2013. Marsu. 24).Komisaun B PN Ezije PNTL-F-FDTL Buka Kilat Lakon iha Krize 2006. Jornal Independent.

¹⁸ Ximenes Florencio. (2013. Marsu. 24).Komisaun B PN Ezije PNTL-F-FDTL Buka Kilat Lakon iha Krize 2006. Jornal Independent.

¹⁹ Fundasaun Mahein. (2014. Abril. 24).Oinsa Siguransa Kilat iha Timor-Leste.Mahein nia blog.<http://www.fundasaunmahein.org/2014/04/24/oinsa-siguransa-kilat-iha-timor-leste/>

Maske kilat preokupa husi entidade hotu-hotu husu atu buka tuir maibe Komandante Jeral PNTL Komisariu Longuinhos Monteiro liu husi media nasional hatete, “Kilat ida lakon ladoko Estadu”. Sai hetok aat liu maka Komandante Jeral PNTL no Sekretaria Estadu Siguransa dudu ba mai kona-bá kompetensia atu buka tuir kilat lakon.²⁰

Iha tempu hanesan Governu kontinua propoin sosa kilat ba instituisaun PNTL ho F-FDTL ho razaun atu troka kilat tuan sira ne'ebé aat ona. Tinan 2014 PNTL propoin tan sosa kilat foun ba PNTL no F-FDTL iha momentu kilat sira ne'ebé lakon seidauk rekolla hotu no jestaun no kontrolu kilat ne'ebé dadaun ne'e sei problematiku hela. FM nia preokupsaun ida tan kona-bá kilat tuan sira ne'ebé la utiliza ona sei rai iha ne'ebé ka destroi? Portantu FM nia preokupsaun kona-bá kontrolu kilat iha instituisaun siguransa.

Maske antes ne'e Membru Parlamentu Nasional Komisaun B Deputadu David Dias Ximenes liu husi media nasional deklarasei hapara proprosta sosa kilat foun ba PNTL,²¹ maibe forsa politika iha Parlamentu Nasional la konsege trava no pasa iha votasaun ikus kilat kontinua aumenta.

FM nia hare katak ida ne'e hatudu la iha seriedade atu rezolve problema kilat sira no la konsidera aspetu importante sira relasaun ho jestaun no utilizasaun kilat iha Timor-Leste ne'ebé dadaun ne'e sei problema hela. Portantu kilat kontinua aumenta maibe kilat ne'ebé lakon kontinua lakon no jestaun ka kontrolu kona-bá kilat sei problematiku hela. Ida ne'e FM hare katak Timor-Leste kontinua aranza problema ba nia estabilidade no risku maka'as liu ba povu portantu dalabarak povu maka sai vitima ba sala utilizasaun kilat husi autor siguransa sira.

Sumariu Rekomendasaun

1. Rekomenda ba Ministériu Defeza no Siguransa implementa rekomendasaun relatóriu investigasaun kilat F-FDTL ho PNTL ne'ebé hasai ona iha tinan 2011. Liu-liu loke prosesu kriminal no disiplinár ba membru PNTL efektivu sira nomos ex-membru PNTL sira ne'ebé laiha responsabilidade ba kilat ne'ebé pertense duni ba sira, no hatudu sira nia irresponsabilidade durante prosesu investigasaun nia laran.
2. Rekomenda ba Ministériu Defeza no Siguransa implementa rekomendasaun relatóriu investigasaun Komisaun Eventual nian iha tinan 2014 iha ne'ebé husu loke prosesu disiplinár no kriminal. Inklui infrasaun seluk ne'ebé la promove pratika governasaun diak.
3. Rekomenda ba Ministériu Defeza no Siguransa ho seriedade hodi kondus prosesu sira ne'e nune'e bele profesionaliza instituisaun siguransa no prinsipi sira governasaun diak.
4. Rekomenda ba Komisaun B Parlamentu Nasional fiskaliza no husu ba Ministériu Defeza no Siguransa katak implementasaun relatóriu investigasaun rua ne'e nian to'o iha ne'ebé ona no oinsa buka tuir kilat hirak ne'ebé sei lakon.

²⁰ Fundasaun Mahein. (2013. Abril. 23). Paradeiru Kilat Ne'ebé Lakon La Klaru no Polemika Kilat Iha Timor-Leste. Mahein nia Lian Nú. 49.pdf.

²¹ Ferreira, Sonia. (2014. Janeiru. 20). Komisaun B Trava Proposta SES Kona-bá Sosa Kilat ba PNTL. <http://suara-timor-lorosae.com/komisaun-b-trava-proposta-ses-kona-ba-sosa-kilat-ba-pntl/>

Bibliografia

Ferreira Sonia. (2014. Janeiru. 20).Komisaun B Trava Proposta SES Kona-bá Sosa Kilat ba PNTL.<http://suara-timor-lorosae.com/komisaun-b-trava-proposta-ses-kona-ba-sosa-kilat-ba-pntl/>

Flo. (2014. Feveireiru. 2014).Kilat Lolon 23 Sei Lakon.<http://www.diariutimorpost.tl/berita-925-kilat-lolon-23-sei-lakon.html>

Fundasaun Mahein. (2014. Abril. 24).Oinsa Siguransa Kilat iha Timor-Leste.<http://www.fundasaunmahein.org/2014/04/24/oinsa-siguransa-kilat-iha-timor-leste/>

Fundasaun Mahein. (2013. Abril. 23).Paradeiru Kilat Ne'ebé Lakon La Klaru no Polemika Kilat Iha Timor-Leste.Mahein nia Lian Nú. 49.http://www.fundasaunmahein.org/wp-content/uploads/2013/04/MNL_nu.-49_23042013_Polemika-Kilat-pdf3.pdf

Relatoriu Final Servisu Komisaun Investigasaun Armas F-FDTL ho PNTL, Husi Minstériu Defeza no Siguransa iha tinan 2011.

Relatoriu Komisaun Eventual Kona-bá Prosesu Akizisaun Kilat PNTL iha PT. PINDAD (Persero).Relatoriu ne'e hasai iha loron 03 Feveireiru 2014.

Ximenes Florencio. (2014. Marsu. 17).KE Husu MP Investiga Long ho SES. Jornal Independente.

Ximenes Florencio. (2013. Marsu. 24). Komisaun B PN Ezije PNTL - F-FDTL Buka Kilat Lakon iha Krize 2006. Jornal Independente.